

Kallari TESALONICENSES

1 de Tesalonicensesbi kallari parluguna

Kai cartadaga apóstol Pabloga Corinto pueblobi gasha, Macedonia llaktabi tiyaj Tesalónica pueblobi tandanukushka crijkunamu kachasha (1.1), Jesucristo wacharishka k'ipa pichka chunga (50) wata shinabimi esribishka yuyachin. Tesalonicaga kunun p'unllaguna maibi Grecia llakta gan, chibimi gashka. Tesalonicami ñuba p'unllagunaga Macedonia llaktada mandaj gashka.

Kai libroga crijkuna ima laya Diosta kushiyachichun yachachin. Shuj yachaganaga kaibi tiyan: crijkunamu alli katinada rikuchina (1.4-10), Diosga Paibujlla linshuyachishka causachun kayaga (4.3-12), Jesús kutin shamunga (4.13-18).

Pablo saludashkamunda

1 ¹Tesalónica pueblobi Taita Dioskun Mandaj Jesucristonbish tanda-nukushka crijkunamumi ñuka Pablomi Silvanon Timoteon Diosbuj kushka allish k'uilla causish kangunabi gachun ninchi.

Tesalonicabi crijkuna alli crishkamunda

²P'unllandija tuki kangunamunda yuyarisha mañagushkabiga Diostaga 'Diosolopai' nigunchillami. ³Kanguna crishkamunda alli rurashkagunada, k'uyin imadash trabajashkada, shinaidi ñukuchida Mandaj Jesucristobi yuyida churashkan ñaubujmu katigushkada alli yachashami p'unllandí ñukuchij Taita shinaidi Diosbuj ñaubuki kangunada yuyarigunchilla.

⁴Dios k'uyashka wauki paniguna, Pai kangunada agllashkadami yachanchi. ⁵Na ñukuchij shimigunallan, ashtangarin imadash ruri pudishkan, Diosbuj Espiritun, tuki shungun crishkanbishi, ñukuchi parlashka Alli Shimiga kangunamu shamuga. Ñukuchi kangunan gasha kangunaj allibuj ima laya k'uyusha ruruj gashkada kangunalladi alli yachanguichimi.

⁶Kangunaga ñukuchij, shinaidi Manduj Jesusbuj rurashkagunada rikusha rurusha katishkanguichi. Chimundami manchanaidi llakibi gagushash Diosbuj Espíritu kushida kushkan, Alli Shimida japiganguichi.

⁷Shina rurashami Macedonia Acaya llaktagunabi causaj tuki crijkunamu

alli katinada rikuchiganguichi. ⁸Kangunamunda kallarisha Mandujbuj Shimiga na Macedoniallabish Acyallabish yachi chayashkachu, ashtan-garin tuki llaktagunabishmi kanguna Diosta crishkaga yacharishka gan. Shina gakimi ñukuchi imada parlanash na ministirin. ⁹Paigunalladimi kangunada rikungu riki ima laya ñukuchida kushilla japishkadash, rura-shka dioskunada sakisha kausuj kabishka Diosmu kuchuyasha Paibujllada rurungu kallarishkadash paigunalladimi parlanguña. ¹⁰Shinaidi Dios kausachishka Paibuj Churi Jesús jawa pachamunda ima laya shamunada kanguna chapagushkadash parlanguñami. Shamuj llakichina p'unlla-mundaga Jesusmi kishpichin.

Pablo Tesalonicabi imada rurashkamunda

2 ¹Wauki paniguna, ñukuchi kangunada rikungu rishkaga na yanga gashkada kangunalladi yachanguichimi. ²Sarun Filipos pueblobi ñukuchida litusha llakichishkadaga ña yachanguichimi. Na parlachun ni-gukish ashtangarin Dios ayudakimi, imadash na manchashalla Diosbuj Alli Shimimunda kangunamu parlaganchi.^a ³Ñukuchi alli yachachisha parlashkaga na pandarishkachuga. Milli yuyigunamada pandachina yuyimadash na chariganchichu. ⁴Ashtangarin Dioslladi ñukuchida aglla-sha Alli Shimida parlachun mingakimi parlanchi. Shujkunaj ñaubuki alli rikuringujka na munanchichu. Ñukuchij shunguda alli rijsij Diosta kushiyachingumi munanchi. ⁵Kanguna yachashka shina shuj kutin-llash ñukuchiga nalladi k'uilla uyanaidi shimigunada parlashkanchichu, shinaidi kuchki japina yuyillash na gashkanchichu. Shina gashkada-ga Diosga yachunmi. ⁶Shuj kutinllash pillash – kanganash shujkunash – ñukuchida 'Alligunami ganguichi' nichunga na mashkashkanchichu. ⁷Cristoj agllashkaguna gashkamundaga kangunada mandi pudinalla ga-shash na mandaganchichu, ashtangarin kangunan gashaga ñukuchiga ima layami shuj mama kikinbuj maragunada k'uyillandi iñachin, shi-naidimi kangunan gaganchi. ⁸Shina llakishkamundami kangunamunga Diosbuj Alli Shimida parlashkallanga na sakish niganchi, ashtangarin kangunada manchanaidi k'uyasha ñukuchi kausidadimi kungu munaganchi. ⁹Wauki paniguna, ñukuchi manchanaidi urmi jatari trabajashkada kangunaga yuyaringuichimi. Diosbuj Alli Shimida yachachigushaga imadash mañasha na kangunamunda kausash nishami, ñukuchiga tuti p'unlla trabajashkanchi.

¹⁰Kangunan ñukuchi linshu shungun, alligunaida rurasha, pish imadash na juchachibuj kausashkadaga kanguna crijkunaga rikungui-chimi. Diosbish rikunmi. ¹¹Kangunalladi yachunguichimi: shuj taita paibuj maragunada yachachij layami kangunadash ñaubujmu katichun

^a 2.2 Pabloga Filiposbi gaga: Hch 16.12-40. Chi k'ipaga Tesalonicabi gagami. Hch 17.1-15

yachachiganchi.¹² Ñukuchiga kanguna ñaubujmu katichun kushiyachisha, ama llaki gachun yuyachisha, Dios valichishkaguna gachun nisha kutin kutin niganchi. Dioslladimi kangunada Paibuj mandanamush Pai-buj k'uilla gashkamushmi kayaga.

¹³ Diosbjuj Shimida kangunamu ñukuchi parlashkada uyusha criganuichi. Na gentegunaj yuyilla gashkada ashtangarin Diosbjuj Shimidi gashkada japiganguichi. Chi Shimimi kanguna crijkunabi rurachigun. Kaigunamundami p'unllandijta Diosta 'Diosolopai' nigunchilla.¹⁴ Wauki paniguna, ima layami Judea llaktabi Jesucristoda crisha Diosbjuj iglillagunaga alli katiga, kanganash alli katiganguichi. Chibi causaj israelgunalladi paigonadash llakichigaguna; shinaidimi kanguna Jesusta criki, kangunaj llaktamundagunalladimi llakichiga.¹⁵ Israelgunaidi-mi Mandaj Jesustash Dios nishkada parlajkunadash wañuchigaguna. Ñukuchidash llujshichish kachugaguna. Diostash na kushiyachisha tukigunada p'iñajkuna gasha¹⁶ na israelguna kishpichishka gachun na munasha Diosbjuj Shimida ñukuchi parlachun na sakigagunachu. Chimundami paigonaga kikin juchan jundashka gagunllaguna. Diosga Paibuj p'iñarishkanmi yallijta llakichinga.

Crijkunada kutin rikungu munashkamunda

¹⁷ Wauki paniguna, ñukuchi kangunamunda ashada ch'ikinyarishka gashash, na rikushkamundaga kanguna yuyillami gaganchi. Chimundami, kangunada rikungaj manchanaidi munashkamunda tuki pudishkada ruraganchi.¹⁸ Chimunda ringu kallariganchi. Yallidjika ñuka Pablollah tauga kutin ringu kallarigani. Shinash Satanasga ñukuchida trankashka.

¹⁹ Shinash ¿pimundadi shuyanchi, kushiyanchi ñukuchij Manduj Jesús shamuki Paibuj ñaubuki ñukuchida allibi churaj coronada japistun? Chidaga kangunamundami.²⁰ Ari, ñukuchida allibi churajka kushichijka kangunami ganguichi.

Timoteoda kachashkamunda

3 ¹Chimunda kangunada rikunaigun wañushash na ri pudishami Atenas pueblobi ñukuchilla^b sakiringu yuyariganchi.² Ñukuchij wauki Timoteoga Cristomunda Alli Shimida parlangu Dioskun igulda rurujmi. Kanguna crishkada jinchiyachisha ñaubujmu katina yuyida kuchun paida kachaganchi.³ Llakiguna rikurikish maijinbish ama washayachunmi paiga yuyachingu riga. Llakigunada ñukuchi apachun Dios sakishkadaga kangunalladi yachanguichimi.^c ⁴Kangunan gashaidimi ñukuchi kai llakigunada japinadaga niganchi. Kanguna yachashka shinайдими chigunaga p'aktashka.⁵ Shinusha naidi shuyi pudishami kanguna

^b 3.1 'Ñukuchilla' nishaga Pabloda, Silastami nin. ^c 3.3 Hch 14.19-22; 2Ti 3.11

ima laya crisha katigushkada tapuchun Timoteoda kachagani. Jucha rurachun munachij kanganada urmachikiga ‘Ñukuchi Alli Shimida parla-shkash imakish na valingachu’ yuyishami manchagani.

⁶Kununga Timoteo Tesalónica pueblomunda shamushami kanguna ima la-ya crisha k'uyanukusha katigushkada yachi chayachiga. Kanguna ñukuchin manchanai kushilla gashkada na kungarijkuna gashkada parlaga. Shinaidi ima laya ñukuchi kanganada rikuna yuyilla ganchi, shinaidimi kanganash ñukuchi-da rikuna yuyilla gashkada parlaga. ⁷Chimunda, wauki paniguna, ñukuchida llakichishka tuki laya jatun llakigunan gashash, kanguna alli crisha katigushka-da yachasha ñaubujmu katina yuyida japiganchi. ⁸Mandajta kanguna jinchí katigushkada yachashami ashtan kununga causagunchi. ⁹Kangunamunda Dios-buj ñaubuki manchanai kushiyanchi. Ñukuchida kushiyachishkamunda tauga kutin ñukuchij Diostaga ¿ima layashi ‘Diosolopai’ nishun? ¹⁰Ñukuchi kanganaj ñawida kutin rikungaj shinaidi kanganaj crinabi jualtushkada p'aktachingaj ni-shami ñalla tuti p'unlla Diosta mañagunchilla.

Mañashkamunda

¹¹Kangunada rikungu ringaj Dioslladi ñukuchij Taita, ñukuchij Mandaj Jesusbish ñanda pushachunmi munanchi. ¹²Ñukuchi kanganada k'uya-shka shina, Manduj kanganabi k'uyida iñachichun, kaishuj chaishujkun tukigunandi ashtan ashtan k'uyanukuna yuyida kuchun. ¹³Tuki shungun alli cripta Dios rurachunmi mañagunchi. Shina ruruki ñukuchij Mandaj Jesús tuki jucha illijkunan shamuna urasbi Dios ñukuchij Taitaj ñaubu-kish kanguna linshuyachishka, pish na juchachibuj ganguichi.

Diosllada kushichisha kausanamunda

4 ¹Kununga wauki paniguna, Dios kushiyachun ima laya kausana-da yachachiganchi. Chi layami kausagunguichi. Shina rurusha ashtan ashtan katichun Manduj Jesusbuj shutibimi mañasha rugagunchi. ²Mandaj Jesumunda yachachishkagunada kanganamu ñukuchi kushka-da kanganalladi ña yachunguichimi.

³Kanguna linshuyachishkaguna gachun Dios munashkaga kaigunami: piyun-bish siririnamunda anchurichun, ⁴⁻⁵Diosta na rijsij na israelguna laya piyunbish sirinukuna munigunamadash ama charisha, tukigunalladi kikinbuj cuerpo^d ima mapash illuj, valichishka gachun jarkarinada yachachun, ⁶shinaidi kai tonobiga crijkunapuraga pidash ama llakichisha pandachichun.^e Shina na allida

^d 4.4-5 Griego shimbiba ‘kikinbuj vazu’ nin. Castellano biblia Reina Valera runa shimi-munga ‘kikinbuj warmida valichisha kausanada’ nin. ^e 4.6 Kaibiga verso 4dash yuyasha, crijkia shuj crijbuj warmin sirinukushkamunda paibuj waukidash llakichin. Tuki Diosbuj Shimida rikukiga crijkuna soltera gashash musu gashash, pi gashash ama sirinukuchunmi nin.

rurajkunadaga ‘Manduj Diosga manchanaidi llakichingami’ nisha kutin kutin ñami niganchi. ⁷Ñukuchidaga Diosga mapayashka kausachunga na kayagachu, ashtan Paibujlla linshuyachishkaguna kausachunmi kayaga. ⁸Shinusha maijin kai yachachishkagunada na valichishaga na ñukuchilladaga na valichinchu, ashtangarin Paibuj Jucha Illuj Espirituda kuj Diostami na valichin.

⁹Kangunalladi k’uyanukuchun Dios yachachishkami ganguichi. Chimunda wauki panigunapura ima laya k’uyanukusha kausanadagarin na escribinashchu gan. ¹⁰Shinashami kangunash Macedonia llaktabi kausuj tuki wauki panigunada k’uyasha kausanguichi. Shina katishaga kanguna, wauki paniguna, k’uyanukushkada ashtan ashtan mirachisha katichun nishami mañanchi. ¹¹Tukigunan k’uilla yuyin purisha, kikinbuj ruranida rurasha, kangunaj makin imallada rurasha ñukuchi mandashka shina kausangu munichi. ¹²Shina alli kausakimi na crijkunash alli nishkaguna ganguichi, shinaidi pidash na ministijkunami ganguichi.

Jesús kutin shamunamunda

¹³Wauki paniguna, ima chapanadash na charijkuna laya ama llakirichun ña wañushkaguna ima tukuna gashkada yachachunmi munanchi.

¹⁴Jesús wañushkada kausarishkadash crinchimi, shinusha Jesusta crisha wañujkunada Paiyun Dioslladi pushash rinadash crinchimi.

¹⁵Manduj yachachishkada kangunamu kashna yachachinchi: Manduj shamungama ñukuchi kausaj sakirijkunaga, wañushkagunadaga na ñaubusha rishunchu. ¹⁶Chi p'unllami mandasha kaparishka, angelguna da mandaj parlarishka, Diosbuj trompetabi tukashkash uyarinmi jawa pachamunda Mandaj Jesuslladi uriyamunga. Chibimi Cristoda crisha wañushkagunaga ñaubusha kausaringa. ¹⁷Chi k'ipaga ñukuchi kausagujkunaga Mandajkun samibi tupanukungu kausachishkagunan p'uyubi tandachisha apushkaguna gashun. Shinami Mandajkun na tukuribuj gasunlla. ¹⁸Kai shimigunanga kaishuj chaishuj ñaubujmu katina yuyida kunukichi.

5 ¹Kununga wauki paniguna, ima wata ima p'unllamundaga kangunamu escribinaga na ministirinchu. ²Tutabi shuwa shamuj laya Mandajbuj p'unlla shamunadash kangunalladi ña alli yachanguichimi. ³Shujkuna, “Kununga ima manchimash illaki chulunllami kausagunchi,” ninukuki, ñash jatun llakiguna tukuchingu shamushaga, iksa charij warmi mirungaj nanida japijma layaidimi tukunga. Chigunamundaga nalladi mitiki pudingachu. ⁴Ashtangarin, wauki paniguna, kangunaga na tutabi laya gashkamunda Pai shamuna p'unlla kangunadaga shuwa layaga na manchachingachu. ⁵Tuki kangunaga p'alaniguj p'unllaj churi ushigunami ganguichi. Na tutaj na ansaj ganchichu. ⁶Shina gashkamundami ñukuchi-ga chaishujkuna laya na puñurinanchi, ashtangarin rijchujkuna tuki alli yuyillandi gashunchi. ⁷Puñujkunaga tutami puñun. Machajkunash tutami

machan.⁸ Ashtangarin ñukuchiga p'unllaj gashkamundaga tuki yuyinmi jarkarijkuna gashunchi. Soldado shina jerro churanada churarij layami Jesusta alli crisha k'uyashash, cascoda churarij layami Jesús kishpichinada yuyillandi shuyasha causashunchi.⁹ P'iñasha llakichishka gachunga Diosga na agllagachu, ashtangarin ñukuchij Mandaj Jesucristomunda kishpichishka gachunmi ñukuchida agllaga.¹⁰ Rijcharishash puñushash Paiyun causachunmi Jesucristoga ñukuchimunda wañuga.¹¹ Ima shinami kanguna ruragunguichi, kaishuj chaishuj ñaubujmu katina yuyida kuhnukusha jinchiyachinukunguichi.

Alli kausachun yachachishkamunda

¹² Wauki paniguna, kangunapurabi jinchida trabajasha Manduj Diosbi yuyachisha pushujkunada allibi churachunmi mañanchi.¹³ Paiguna allida ruragushkamundaga k'uyasha 'Alli allimi' nina ganguichi. Kaishuj chai-shuj k'uillada causichi.

¹⁴ Wauki paniguna, kaigunada ruganchi: imadash na rurajkunada rimichi, mancharijkunamu ñaubujmu katina yuyida kuichi, na jinchi cri-junkunada jinchiyachichi, kangunash tukigunan na ut'ka p'iñarijkuna gaichi.

¹⁵ Yuyin ganguichi: maijin ima na allida rurakish ama shinalladi rura-nuguichichu. Chibuj randiga kangunapurabish shujkunamush p'unllandi tukigunan allida rurana yuyillan gaichi.

¹⁶ P'unllandijta kushilla gaichi. ¹⁷ Diosta mañanada amalladi sakichi-chu. ¹⁸ Tuki imamundash Diosta 'Diosolopai' ninguiichi. Cristo Jesusbi Diosbuj munashka kangunamu shinami gan.

¹⁹ Diosbuj Espirituj nina shinada ama wañuchinguichichu. ²⁰ Dios ni-shkada parlujkunaj parlushkada na valichisha na uyush ninguichimu.

²¹ Imalla parlachishkagunadaga alli gashka na alli gashkada alli yuyari-chi; alligunaidami wakichinguichi. ²² Tuki laya millimunda anchurichi.

²³ Alli k'uilla kausida kuj Dioslladi kangunada illijta linshuyachichun. Paiga kangunaj tukida, espiritudash, almadash, cuerpodash Mandaj Jesu-cristo shamuna p'unllagama pish na juchachibuja alli alli wakichichun.

²⁴ Kangunada Kayajka tukida P'aktachijmi; kaigunadash p'aktachingami.

Tukurina yuyigunamunda

²⁵ Wauki paniguna, ñukuchimundash Diosta mañichi. ²⁶ Tuki wauki panigunadash alli yuyin ñawi ichibi muchasha saludichi. ²⁷ Mandaj-buj shutibi kai cartadaga tuki wauki panigunamu liyachun mingani. ²⁸ Ñukuchij Mandaj Jesucristo kushka alliguna kanganabi gachun.